

衛藏通志
二



叢書集成

初編

主編者
王雲五

商務印書館發行

H

T 10

504



衛藏通志

(二)



撰人未詳



913-6

衛藏通志卷二

疆域

謹案衛藏疆域舊志所載東至巴塘之南墩東南至類伍齊番族東北至青海屬之納木稱巴顏番族南至豬獠茹巴怒江西南至布魯克巴部落北至草地通回部沙雅爾西北通回部和闐仍照舊編纂惟後藏極西邊界壬子秋廓爾喀投誠遵照新定界址設立鄂博地方編纂

乾隆五十七年九月奉上諭立定地界一事已有旨令福康安等應於藏內邊界一一設立鄂博毋許私行偷越現在大兵將撤此事最關緊要福康安等宜趁此時詳細曉諭申明約束以熱索橋迤西如協布魯雅雅東覺堆補木帕朗古等處皆經大兵攻克本應卽以爲後藏邊界今念爾悔罪投誠仍行賞還其熱索橋以內濟隴聶拉木宗喀等處本屬藏地前此雖經汝侵占現經大兵收復非如上次講和退還者可比嗣後以濟隴聶拉木以外爲界爾部落人等不得尺寸擅越如有私行偷越者一經拿獲卽行正法爾部落遇有遣使進貢獻表等事亦當先行稟明邊界將領聽候知照方准進口如此明白曉諭立定鄂博章程庶可永斷葛藤肅治邊界欽此

十二月大學士公福康安等會奏章程內開查西藏邊界如濟隴、聶拉木、絨轄、噶爾達薩喀、崑布等處均與廓爾喀道路相通。臣福康安等於濟隴外之熱索橋、聶拉木外札木地方之鐵鎖橋及絨轄邊界均已設立鄂博釐定疆域將巴勒布貿易之人及唐古忒番民零星商販已奏請立法稽查不許私相往來應交與駐藏大臣於巡視之便認真查察隨時派人堆砌不得日久廢弛致有偷越等因具奏奉旨依議欽此。

五十八年正月大學士公福康安工部尚書都統和琳等具奏爲接據廓爾喀王拉特納巴都爾稟稱蒙公中堂大將軍差穆大人前來聶拉木札木一帶分立地界小的卽差頭人前往穆大人已經分定辦理甚妥小的悅服卽照穆大人所立地界永遠遵奉不敢私毫有違自取罪戾還望公中堂大將軍在大皇帝前將小的一片誠心奏聞常常施恩感激不盡等語隨檄該王宣示大皇帝天恩赦爾等前罪爾等復將凜遵約束永矢恭順冀受大皇帝天恩等因具稟足見爾等一片誠心本大將軍回京時必將爾與爾叔感畏大皇帝恩威永爲藩服誠悃代爲陳奏自蒙聖明俯鑒渥施恩眷現在駐藏大臣工部尚書都統和大人爲大皇帝親信大臣特命來藏整飭鎮撫嗣後爾等如有稟呈事件當在和大人前稟明聽候指示卽將來更換之駐藏大人凡有應行曉諭事件爾等惟當一一遵奉毋稍違悞等因具奏奉硃批知道了欽此。

三月駐藏大臣工部尙書都統和琳奏爲接據廓爾喀王拉特納巴都爾稟稱前差穆大人定立地界極爲公道惟有廓爾喀東邊多羅卡界內拉結撒儻兩處地方原係廓爾喀所管此時該處營官不許小的管理懇求查明賞給等因又譯看寄班禪信內云從此以後兩家照舊和好永遠不敢滋事所有底瑪宗地方原係給了你們的可卽差人前來管理各等語臣當卽飭令噶布倫詳細確查多羅卡邊界拉結撒儻兩處本係廓爾喀地方前經福康安差穆克登阿第巴前往定界時在熱隴橋設立鄂博爲界其多羅卡地界拉結撒儻兩處係在熱隴橋以外相距四五程途自應歸廓爾喀管理臣一面飭令絨轄營官遵照將熱隴橋以外之多羅卡拉結撒儻兩處地方仍聽廓爾喀管理不許占越滋事再查底瑪爾宗地方係廓爾喀所管因五十三年彼此說合廓爾喀願將此地方送與薩迦呼圖克圖作爲酬謝當時雖有此議並未收管臣伏思上次唐古忒許銀講和及廓爾喀許地酬謝俱屬不成事體廓爾喀既經悔罪投誠將上次合同業已繳銷永不敢再提一字今該部長改悔前非雖欲與衛藏修好仍將前許之地讓還管理自屬恭順之意但思該部落既附藩封歸入版圖卽與唐古忒無異未便仍照前次私議令薩迦呼圖克圖收受查歲琿堪布現在前藏臣面諭毋得差人前去收管併傳知班禪札飭薩迦呼圖克圖遵照一面檄諭廓爾喀部長今將底瑪爾宗旣在鄂博之外自應仰副皇上柔遠之意賞與該部長管理等因具奏奉硃批諸凡皆妥欣慰覽之

欽此。

六月駐藏大臣副都統成德自定結具奏。查閱後藏各邊界新設番兵及履勘鄂博情形。惟定日地方遼闊。爲聶拉木、宗喀、絨轄三處總匯之地。實爲緊要。查所通絨轄之小路。轄木多通宗喀大路。擦木達杏通聶拉木之小路。古喇噶木炯並宗喀。共計五處。均爲要隘。每處設定琿一名。番兵二十五名。卽於定日現設番兵五百名內。就近派撥安設。似於聲勢更爲聯絡。亦不妨其隨時操演等因具奏。奉硃批。欣慰覽之。欽此。

七月駐藏大臣工部尙書都統和琳副都統成德具奏。查閱帕克哩定結各卡隘情形。所噶爾達地方卡隘二處。一名薩迦嶺。一名春堆。此二處均與廓爾喀相通。又定結地方卡隘一處。名擢拉山。此處與廓爾喀。哲孟雄相通。又帕克哩地方卡隘三處。一名哲孟山。與布魯克巴相通。一名哈爾山。與布魯克巴小路相通。一名宗木山。與宗木相通。以上卡隘六處。均歸江孜前後藏大道。爲總匯要隘。臣成德親赴各處。逐一查勘。俱極嚴密。所有臣成德回藏日期及查閱情形。理合會銜具奏。奉硃批。知道了。欽此。

九月駐藏大臣工部尙書都統和琳副都統成德等具奏。哲孟雄作木郎二部落。在藏邊界外。不過每年與達賴喇嘛。班禪額爾德尼通問書信。不聽藏中調遣。被廓爾喀侵占。已有十年。去歲經福康

安徽令協勦。又復藉稱天熱畏懦不前。迨聞廓爾喀歸順。復思藉天朝威勢。請斷還六輩達賴喇嘛所定舊界。並請添設番兵。由商上給與錢糧。代爲守禦。經福康安及臣和琳等窺其情僞。將懦弱無能貪得便宜隱衷。逐一指駁。一面檄諭令廓爾喀約束手下人。毋許欺凌弱小。一面將邊外極邊小部落即可置之不問等情具奏。奉到硃批。所議皆妥。知道了。欽此。又旁批。可惡之見。不可從。欽此。自去年至今。一年有餘。該二部落自知理短辭曲。未敢復來懇乞查。廓爾喀王公叔姪。自歸化以來。諸事稟命而行。實爲小心恭順。昨於六月初。特遣頭人哈斯達爾薩野等至界。稱有面稟事件。據聶拉木營官稟報前來。臣等因發給路票。差人護送到藏。據哈斯達爾薩野等將其國王請安稟帖。及土儀鎗刀各一件呈遞。稟稱該國王及其叔巴都爾薩野。凜遵大皇帝諭旨。並將軍大人們教導。愛惜百姓和睦鄰封。從未多滋事端。惟作木朗哲孟雄二部落之人。素來不安本分。往往造言生事。誠恐他們在大人們面前架說是非。又爭地界。那時大人聽信一面之辭。小的國王就擔不是。所以差小的等前來回明。哲孟雄營官寨並喇嘛廟。及其餘各寨落。俱被我們占了。已有十年。現在哲孟雄只贖了日尼杵及崗多二處。我們現係天朝子民。固不敢妄自動兵。亦不肯令其覆滅。目下皆係各守境土。又作木朗亦係廓爾喀占了多年。只贖該部長之叔蘇班色一名。本係壞人。現在聞他往各部落借兵。希圖恢復。各部落皆未曾幫助。我們亦未窮追。誠恐蘇班色造言來告。小的國王求大人們

都不要聽他的話。並請差官定立交界等語。臣久知哲孟雄作木朗二處並非藏屬。爲廓爾喀侵占已久。且該處番民窮苦。貪占便宜。較唐古忒爲尤甚。隨傳噶布倫等詳細查問。委係被廓爾喀侵占已有十年。噶布倫所知情形。亦與哈斯達爾所說無異。是該二部落與藏中毫無關涉。而噶布倫及無知僧人轉稱此二處雖不屬藏內管理。向來與達賴喇嘛相好。彼處廟宇俱是經典上有的。今廓爾喀畏懼天朝。既來請示。求大人們趁此機會。仍照六輩達賴喇嘛所定地界剖斷。豈不兩便等語。臣等因唐古忒人本糊塗。貪得便宜。不知事理輕重。固不值深加責備。當卽告以該二部落既係經典上有的。當初廓爾喀侵占之時。你們不去幫助。今廓爾喀既已恭順天朝。卽屬大皇帝臣民。與唐古忒一樣。況該國王侵占哲孟雄作木朗地方。在歸順天朝以前。本欽差焉有不爲屬國反斷還不屬藏內管轄部落之理。反覆窮詰。俱各俯首。臣等公同商酌。廓爾喀恭順小心。既來請示。固不可令其欺凌弱小。亦不值代爲分定疆界。自當遵照前奏置之不問。隨於次日傳集哈斯達爾等面諭。哲孟雄作木朗二部落雖非藏內統轄。究屬與達賴班禪二喇嘛從前相好。既稱爾國侵占已有十餘年之久。本欽差斷不肯仍然令爾退還。但哲孟雄現在僅有日尼杵崗多二處棲身。作木朗亦僅有蘇班色一人。臣爾等當體大皇帝好生之心。不可過於追迫。各安本分。歸告爾王。總以凜遵大皇帝諭旨和睦鄰封。愛惜百姓。方不負大皇帝成全爾國至意。至於邊外地方。本欽差亦不值差官代定交

界當據哈斯達爾伏地叩頭感激悅服之情。形於顏色。臣等隨酌量賞與盤費。派員護送起行。並與拉特納巴都爾緞錦等件。以爲酬答。一面嚴飭各邊界頭人。亦不得容留該部落之人。致滋事端也。等因具奏。奉硃批。所辦得理。好。欽此。

十一月初五日。奉上諭。和琳等奏廓爾喀差頭人哈斯達爾薩野到藏請安遞稟一摺。所辦得理。已於摺內批示矣。廓爾喀因侵占鄰近部落地方。惟恐其希圖恢復。差人赴藏稟明。並又續請差官定界。設遇胥無定見之人。又必聽從所請。率爲割斷邊界。又致生事端。卽如藏中噶布倫及僧人等。俱以該二處雖不屬藏內管理。向與達賴喇嘛相好。彼處廟宇。俱係經典所有。請仍照六輩達賴喇嘛所定地界。爲之割斷。此等愚昧無知之人。經該部落侵凌。卽懦弱無能。紛紛逃散。及仰仗天朝兵威平定之後。又復藉勢貪佔便宜。妄求定界。今和琳並不聽信噶布倫等浮辭。實屬可嘉。卽向廓爾喀頭人明諭。既不准其欺凌弱小。亦不復更爲分定疆界。既不聽藏中覬覦之心。亦足以悅服廓爾喀之心。而哲孟雄等部落。聞知天朝割斷公允。亦必益加感畏。實爲得當。嗣後接任之員。遇有此等事件。俱當堅持定見。仿照辦理。切勿爲浮言所惑。邊界自可永遠甯謐也。將此諭令知之。欽此。

五十九年正月。駐藏大臣工部尙書都統和琳。副都統成德等具奏。爲籌辦藏界。補立鄂博。以期久遠事。查有藏屬薩喀邊外。作木朗以東。洛敏湯地方一處。人戶三四百家。向來頭人。係其自立自廢。

既非藏屬。又不屬作木朗管理。閒嘗差人與達賴喇嘛呈遞哈達。或送銀錢五六十圓。以爲布施。五
十三年以前。亦被廓爾喀侵占。每年卽與廓爾喀當差。仍送商上銀錢五六十圓不等。自五十七年
大兵進勦時。洛敏湯便不與廓爾喀交納錢糧。去年。廓藩貢使到藏面稟。應歸於何處管理。臣等詳
細查明。委係另有一小部落。與藏中毫無關涉。但離薩喀邊界止有三天路程。恐唐古忒退有後言。
臣等曾面與達賴喇嘛噶布倫等商議。洛敏湯一處。固非藏內地方。然離邊界較近。爾等如以地方
緊要。本欽差卽不許廓爾喀侵佔。廓爾喀亦必不敢不從。但既歸藏內管理。其頭人出缺。自應歸駐
藏大人及達賴喇嘛揀放。錢糧亦應交納商上。未有三四百戶只交銀錢五六十圓者之理。且屬朋
情布施。亦難向廓爾喀啓齒。據達賴喇嘛噶布倫等僉稱。洛敏湯頭人向來俱係其自立。不屬藏中
管轄。彼處百姓亦皆桀驁難馴。斷不服管。商上亦不藉伊五六十圓銀錢用度等語。臣等仍遵前旨。
仿照辦理。哲孟雄作木郎之例。面諭該貢使。以洛敏湯係邊外極邊小部落。並非藏內管轄。應聽爾
自行辦理。歸告爾王。總以凜遵諭旨。和睦鄰封。愛惜百姓。毋得稍有越佔。致負天恩等語。該貢使叩
頭感於辭色。臣等因思濟隴、聶拉木、絨轄各邊界業經臣福康安俱已派員酌中立有鄂博。而藏界
西南通外番地方。如薩喀、定結、帕克哩等處。均未定有鄂博。難保日久不無爭端。查遊擊張志林熟
於邊務。令其帶領營官。先行前往各邊。會同各營官。自薩喀起。酌於緊要處所。將應立鄂博地方。繪

圖貼說。毋得草率從事。三月間。卽應駐藏大臣巡邊操演漢番官兵。臣和琳於二月底起身到彼。計張志林可以辦竣。統俟。臣親自酌定。眼同堆立鄂博。實爲一勞永逸之計。是藏中皆有定畧。嗣後邊外各部落。設與廓爾喀少有爭競。總與藏中無涉。廓爾喀亦斷不敢妄踰一步。唐古忒人雖糊塗。亦有遵循。可期永遠無事等因具奏。奉硃批。知道了。欽此。

五月。駐藏大臣工部尙書都統和琳奏。爲定日閱兵完竣。隨帶遊擊張志林、噶布倫丹津、那木結戴、琿拉旺策卜丹等。攜帶噶廈底案。由薩迦宗喀、聶拉木、絨轄。定結、帕克哩沿邊一帶。率同該處營官。悉心講求。查對底冊。張志林所擬應立鄂博處。所均與噶廈底冊。及年老番民稟告相符。查各處路徑崎嶇。雪山重疊。臣分派營弁。眼同各該處營官。將舊有瑪尼堆者。加高添砌。其全無形迹者。一律堆設整齊。所有唐古忒西南與外番布魯克巴、哲孟雄、作木朗、洛敏湯、廓爾喀各交界。均已劃然清楚。再查。定結屬下有噶爾達一處。亦係通廓爾喀小道。向屬阿哩公管理。而阿哩公駐劄前藏。每年遣一人前往收取租息。臣查五十二年。郭爾喀卽由此回巢。原不屬營官管轄。是以毫無阻滯。今臣飭噶布倫將商上非屬緊要莊田。核其所得租息。撥與阿哩公一處兌換。將噶爾達歸於定結營官管轄。以重邊防等因。

西界

西至廓爾喀部落爲界。由前藏西行。經聶黨緒。過鐵鎖橋。至干壩拜爾吉。過干布拉。即西崑崙至羊卓白

地。沿海行走。由仁蚌至日蓋子。卽札什倫布。仍仲甯翁結巴寺後山。自札什倫布西行十日。至三桑。乃阿哩界。由三桑過崗得寨。入阿哩噶爾渡界。一由三桑墨雨拉。經脅噶爾。至聶拉木交巴爾布界。

此係舊志所載

案。新定界址。自札什倫布西行。由拉孜。至脅噶爾。定日。宗喀。薩喀。通狹巴嶺山。鍋拉納山。畢

都納山。朗古山頂。納汝克喀山頂。朗雜山頂。均設立鄂博。此內爲唐古忒境。此外爲洛敏湯。作木朗。二部落境。又自宗喀通濟嚨。至熱索橋。設立鄂博。此內爲西藏境。此外爲廓爾喀境。又自定日通聶拉木。至鐵鎖橋。設立鄂博。此內爲西藏境。此外爲廓爾喀境。又自拉孜通絨轄。至波底山頂。設立鄂博。此內爲西藏境。此外爲哲孟雄境。又自定結至薩熱喀山頂。臥龍支達山頂。羊瑪山頂。設立鄂博。此內爲西藏境。此外爲哲孟雄境。又自干壩至洛納山頂。丈結山頂。雅納山頂。設立鄂博。此內爲西藏境。此外爲哲孟雄境。又自帕克哩至支木山頂。臧猛谷山頂。日納。宗官察。設立鄂博。此內爲西藏境。此外爲哲孟雄。布嚕克巴。二部落境。又臧曲大河南。本係哲孟雄地界。被廓爾喀侵佔已久。臧曲大河以外。俱係廓爾喀境。

西南至布魯克巴、巴勒布二部落爲界。巴勒布今屬廓爾喀。一由納格爾行八日至帕爾。與布魯克巴交界。山川

險阻。難以出入。一由業爾奇木樣納山業朗地方至結隆。與哲孟雄宗里口交界。一由業爾斯卡祿納山業朗寨爾交廓爾喀界。俱係險道。西南又自怒江北哨義桑昂却宗。瀾滄江各處。至阿布拉通南墩大道。

南界

南至豬猡茹巴之怒江爲界。由拉撒東南行一日。過鍋噶拉大山。至宋布堡。過宗噶拉山、札拉山。至押噶。交藏江。至怒江。其地廣闊無垠。不能悉載。怒江之水。不知其源。江闊數里。兩岸石壁峭立。中流急湍。不可以舟楫。其地亦名工布。

東南界

東南由前藏朗陸山轉出達則。經珠貢寺。及沙金塘草地。古樹邊卡。至春奔色。接類烏齊界。通察木多大道。

東界

東至巴塘之南墩甯靜山爲界。雍正三年。松潘鎮總兵周瑛勘定。疆址始定。於南墩甯靜山嶺上建

立界牌。嶺東之巴塘、裏塘屬四川。嶺西屬西藏。其中察卡中甸。由前藏東行十里許。過機楮河。即藏江至墨竹工路皆平坦。自此經拉哩碩板多。察木多。乍了。江卡。至南墩。跬步皆山。崎嶇險仄。計程三千五百零五里。

東北界

東北至西甯所管之那木稱巴彥等番族爲界。由前藏北行十五里。向色拉山東。過鍋拉山。至浪宕。由隆竹松過彭多河。有鐵鎖橋。過河。由角孜拉山。呼正寺。增頂工。至木嚕烏蘇。通西甯大道。又由玉樹接西甯。松潘。泰甯三處大道。又通略隆宗。類烏齊地方。

北界

北至草地爲界。由前藏西行。出羊巴井口。至新橋。卽平川。西通後藏。東接噶勒丹。北行草地。至木嚕烏蘇。噶爾藏骨岔。交青海界。

西北界

西北亦係草地。有克哩野大山。納克產隘口。北通哈具得卜特爾。又北直至木嚕烏蘇渡口。仍交西甯大道。其東接玉樹界。又羊巴井至桑沱洛海。過紅塔爾小山。過拉納根山。卽騰格哩諾爾。即天池也達

木地方係每年出防處由吉札卜至價格物角隘口東北至噶爾藏骨岔阿爾坦諾爾一帶俱通沙雅爾和闐回疆地方

